



Prestaziun nia da bravé cuntra i avversars dl Gsies, che anuzëia bun les püces ocapiuns y mët al sigü le resultat tl secundo tēmp.

Na pordüda antia chëra dl'ultim fin dl'edema ite a Gsies, ulache i patruns de ciasa lascia udëi superiorité por ci che reverda la determinaziun y l'agresivité. Ince sce i ghesc ladins se prejentëia cun en gröm de ocapiuns dan porta, mancel deplëgn la dezijiun da fa le gol, deperpo che i avversars rebat le palé te porta amez le secundo tēmp sön üna dles püces ocapiuns y se asigurëia insciö i trëi punc.

La partida mët man cun val menüt de retard, a gauja de na incomprendiun cun l'arbitr por ci che reverda l'orar de scomenciament. Atira dal mëteman anuzëia le Gsies la gran lerch amesa les lines dla formaziun ladina por fa le jüch y ruvé sënza gran dificoltes te area. Insciö toma ince la pröma gran ocapiun por le Gsies, le mezciamp avversar vëiga bun le defensur fora de posiziun y fej pié ia na passaja filtranta por l'atacant sú dan porta, por fortüna röia la trata de chësc dlungia porta ia. La spordüda fej desdé i ladins, che é bugn de imposté val aziun cuntra porta, al 20^a vëgn le atacant Alexander sorví cun n palé alt y prô le palonët sura le portier fora che ne ti garetia indere nia. Ince val trata pëia ia dal limit cuntra le portier malsigü, che stënta a se tigní le curan ti brac, impone ne ó le palé ruvé dait ala linea. Tl'ultima pert dl pröm tēmp é la defenjiun da La Val sot a presciun, i pai ne röia nia plö sura le mezciamp y i ladins mëss se confronté tres indo cun i portadus dl palé che röia cina sö dan area. I sogadus va tosc tla palsa a tra le flé y a se ciarié sö por la secunda pert.

Le pröm tēmp se röia sön le 0 - 0

I avversars sënt atira le druch di sogadus da La Val dal scomenciament dl secundo tēmp, che partësc fora damì i pai sön les perts y ciafa plö saurí le trú cuntra porta. Al 55^a ti sciampa Franz ala defenjiun mo se tira massa da na pert fora, al vega impó la trata che röia indere dlungia ia.

Püch do se prejentëia le medemo Franz dal' atra pert te area aversara y pro ciamó n iade la trata, chësc iade é le un dl Gsies che tēgn sō le curan. I aversars respogn al druch ladin cun val ripartēnza prigorosa, chiló é al comane le defensur amez Marco C. che fej bun só laur architan tl dērt mumēnt i atacanc y devian le palé da na pert fora. Al 70[^] menüt n'atra ocajiun por La Val, Max N. fej só le palé, driblëia bun la defenjiun y mēt amez na bela crossada che ne vëgn indere nia anuzada dai atacanc. Tosc suzederà spo sciöche ara é gunot tl jüch dl palé, fora de n sarëgn, do n avëi odü indî nia plö le Gsies te area ladina, sōn na ripartēnza vëgn le palé crossé amez por le atacant Pizzinini che cun n bel stach de ce rebat le palé te porta por le 1 a 0. Na saíta por La Val che mëss ciaré de oje le resultat ti ultims 10 menüc. Cun coraje se alza la squadra, Adrian vëegn sorví al limit dl'area, imped se fa lerch cuntra porta fejel pié ia na trata dal limit che é indere massa alta. A ti mēt le bastun tra les giames ai sogadus é ince le arbiter, plö iadi ne vëgn contrasc evidënc nia conzedüs al limit dl'area, nia de morvëia sce i sogadus vëgn nervusc y mēt man de strité tra de vëi. I sogadus dl Gsies se fej ciamó prigorus cun val inserimënc di atacanc mo por fortüna ne vëgn le resultat nia radoplé, mo dal'atra pert ne vëgn chësc nianca avalié.

L'arbiter fej tosc ruvé i nonanta menüc de jüch, La Val mëss insciö dlotí na pordüda ajia che i fej tomé zeruch de posiziun. Ince sce la matematica ne tradësc ciamó daldöt nia le trú por le secundo post, mëss i ultims 9 punc poscibli gní concuistá deplëgn speran de na ciumpedada di aversars dl Dietenheim y dl Sest, atualmënter dant. Ala squadra dla Val Badia ti va dal'atra pert i mius complimënc por la conquista dl pröm post de campionat a trëi partides dala fin cun la promoziun miritada te secunda categoria.

Gsiesertal – La Val : 1 - 0

Formaziun La Val: 1. Sepl Kantioler, 2. Luca Pescollderung (dal 70[^] Paolo Vallazza), 3. Egon Frenes (dal 55[^] Werner Sottara), 4. Martin Ploner, 5. Marco Castlunger, 6. Christian Dapoz, 7. Marco Sottara (dal 45[^] Max Nagler), 8. Stefan Sottara – capitan, 9. Alexander Miribung (dal 75[^] Adrian Miribung), 10. Michele Campeï (dal 45[^] Franz Tolpeit), 11. Alex Elzenbaumer

Proscima partida: *In dumënia ai 15 de má dales 16:00 te ciasa cuntra le Mühlwald*

Atri resultac:

Altherren: Terenten - La Val : 2 - 0

Juniores: Natz - Val Badia : 2 - 3

U-15: Mareo/LaVal – Raas : 1 - 2

U-13: Pro Team Blau - La Val: 6 - 0

U-10: La Val – Rasen/Antholz II: 2 - 0